

新元史

第四册

列傳第九十

新元史卷之一百九十三

賜進士出身日講起居注官翰林院侍讀國史館纂修膠州柯劭忞撰

趙天麟

鄭介夫

趙天麟東平人博學能文世祖至元末以布衣進太平金鏡策前後數萬餘言議論政事多切時宜嘗獻其大要曰國家鋪張治具整頓條綱內焉三公九卿外而庶疆諸尹例皆舉賢推德揆務分司蓋欲有生皆樂無物不安旁推惻隱之心續迓文明之治至於中書一令樞密一使嘗使東宮領之連旬累月望儲闈銅輦之臨虛榭空帷設銀棨金墀之坐事專歸於副相政並決於同

僚臣以爲中書者機務之關津天門之鎖鑰樞密者疆場之守衛熊虎之綱維軍民二柄治亂所關非其才尙恐難行曠其官云何可治且太子正名之後雖諸王莫得而同有三師三少之徒立詹事屬官之院君行則守有官則從從曰撫軍守曰監國又何必列一品之高階占大臣之上位名爲重之適所以輕之也若謂藉其重以鎮之則太師太保太傅司徒勳舊大臣亦嘗任之矣觀彼四職不下於此皆令異姓爲之何獨他人不可居此職哉况太子之道春誦夏絃秋習禮冬讀書龍樓問寢殷勤於內豎之前甲觀尊師懇惻於春官之側以徽

柔爲本以仁孝爲先及其旣冠則有記過之史徹膳之
宰進善之旌敢諫之鼓此所以周公示法於成王賈誼
忠告於漢文伏望慎選耆碩早加輔導無令降居臣職
則乾符來握黔黎知大本之安震德維新天地有長男
之美更望陛下近擇宗室旁及岩穴舉大賢充令使之
官卽以錫軍民之福也禮天子立七廟在都內之東南
太祖中位乎北三昭在東三穆在西廟皆南向主皆東
向都宮周於外以合之墻宇建於內以別之門堂室寢
分方庭砌唐陳異地山節藻梲以示崇高重檐刮楹以
示嚴肅斲礪其桷以示麗而不奢覆蓋用茅以示儉而

有節蓋廟之制度也祖功宗德百世不易親盡之廟因新而祧祧舊主於太祖之夾室祔新主於南廟之室中昭以取其向明而自班乎昭穆以取其深遠而常從其穆穆祔而昭不動昭祔而穆不遷二世祧則四世遷於二世而六世遷於四世以八世祔昭之南廟矣三世祧則五世遷於三世而七世遷於五世以九世祔穆之南廟矣孫以之祔於祖父孫可以爲王父尸由其昭穆之同非有尊卑之辨故祧主旣藏祫則出餘則否祔廟貴新易其檐改其塗蓋廟之祧祔也散齊七日致齊三日牲牷肥腍旨酒嘉栗粢盛豐潔器皿具備衣服旣鮮水

火又明祀宜羔豚膳膏薌禴宜腍臠膳膏臊嘗宜犢麋
膳膏腥烝宜鱣羽膳膏膾設守祧所掌之遺衣陳奕世
遞傳之宗器王后及賓禮成九獻辟公卿士奔執豆籩
此廟之時祭也太祖廟主循常東面移昭南穆北而合
食就已毀未毀而制禮四時但陳未毀而祭之五年兼
其已毀而祭之此廟之祫祭也三年大祭祭始祖之所
出以始祖配之此廟之禘祭也臣聞祭祀者人之大端
衣食者人之常理聖朝立太常之正卿設司農之大寺
職尸三禮望重三農欽乃攸司可謂備矣但今藉田之
禮尙未施行公桑之儀似猶虧闕至如郊天祀祖奚爲

具豐潔之粢盛有事致齊何以得鮮明之衣布則將發
倉廩而取粟向坊局而求衣是皆農夫之所樹藝紅女
之所繰織雖有藉田而實非陛下之所耕也雖備服物
而實非後宮之所出也以之對越神祇享於祖禰道或
未盡禮不徒成陛下之心能無少歉乎謹按禮經之義
遠稽前古之文適三陽交泰之春當是月上辛之日祈
穀於太微之帝再擇乎吉亥之辰封人壝宮掌舍設枵
太僕秉轡保介從行綴黛耜於紺轅冠朱紘之華冕平
秩東作爰至南郊天顏咫尺恭就三推黎庶三百遂終
千畝公卿以下隨爵秩而亦耕燕飲之宣布龍光於旣

返內宰獻種於厥后神倉斂穫於西成一旦用之中心
足矣此天子藉田之禮也載按古經之文周達王后之
制衣服不備不敢以祭天子有公桑之地地逼於川築
蠶室於其旁建后宮於其上宮高一丈棘繞垣墉外戶
扇而掩之禁伐桑柘因具植筐后妃齊戒而臨焉戕斧
由斯而動矣浴蠶乎水戾葉乎風蠶卒眠矣歲旣單矣
吉婦之勤就矣奉繭獻於后矣后於是而言曰此以爲
君服與遂副禕而受之少牢以禮之復詮良日后乃親
繰手旣三盆事終羣下染以玄黃朱綠爲之黼黻文章
君王致祭從而服之此后妃公桑之制也望陛下勿怒

號公之直諫式同漢帝之親耕于彼大田成茲盛事更望中宮協聖倣古親蠶大增助日之月光深盡配天之坤厚如此則下使田家服勤上獲宗廟垂祐矣井田之法六尺爲步步百爲畝畝百爲夫夫三爲屋屋三爲井井方一里凡九百畝其中爲公田八家皆私百畝同養公田井百爲成成方十里成百爲同同方百里同百爲畿畿方千里臣嘗計方千里之地提封百萬井山川城市等除百分提封之三十六外定六十四萬井中爲私田五萬一千二十萬畝其井中區除宅居二十畝之餘爲公田五千二十萬畝又乘除粟稻等子粒之多寡每

畝歲率一石五斗計之則私田子粒可得七萬六千八百萬石公田子粒可得七千六百八十萬石其鰥寡孤獨無告者尤先賑惠焉上下相睦貧富相均此隆周所以旁作穆穆迓衡而孟子所以不憚區區告人也自嬴秦變法之後富者田連阡陌貧者無置錙之地越至於今迫於豪富官貴而不能復聖朝東西南北地境無窮國家用費之資僅足下民愁歎之聲未除且古者方千里之地得公田子粒七千六百八十萬石今能得之乎臣知其斷不能也方今之務莫如興復井田尙恐驟然騷動宜限田以漸復之望陛下一新田制凡宗室王公

之家限田幾百頃無族官民之家限田幾十頃凡限外退田者賜其家長以空名告身每田幾頃官階一級不使居實職凡限外蔽欺田畝者坐以重罪至限外之田有承佃者卽令佃戶爲主其未經開墾者令無田之民占而闢之本年免其租稅次年減半三年始依例科徵所占田亦不得過限其無田之民不欲占田者聽以後有賣田者買田亦不得過限是私田既定乃定公田公田之法凡九等一品者二十頃二品者十八頃三品者十五頃四品者十二頃其下俱以二頃爲差至九品但二頃而止庶乎民獲恒產官足養廉行之五十年後井

田可復興矣方今御史臺官內有監察院以隸之外有
廉訪司以承之所以整齊百僚激揚百姓御史之職非
天子視聽之官而何哉是以霜蘭露車柏林石室昭其
清也授以立秋象以熒惑昭其嚴也鷹擊之喻豸冠之
服昭其威也干步清道王公遜避昭其重也中書門下
並爲三司昭其貴也五者備矣然後能觸邪指佞使雄
奸巨猾膽破聲消封豕長蛇骨寒心顫將狐狸眇害蠱
蠱微毒不攻而自息矣顧阿合馬擅政於前桑哥弄權
於後臺官以下閉口吞聲宴居高坐幸而太原俠客揖
聶政之高風大理名卿致臯陶之淑問一旦兇渠頓剪

赤子更生美則美矣未盡善也且我國家建茲臺班豈徒稽朝祭之末儀糾案牘之細事已哉然而不言蓋由省府之職秩懸殊而不敢抗衡故也况權臣之計百網千機崔斌楊居寬等同爲執政猶陷之於死地進而守正則徒遭刑戮而令聖朝有殺直之名退而引病則誣以不忠而謂不肯效皇家之力伏望厲憲臺之丰采俾行省以齊階則委任旣專而體統自肅矣臣聞設紀張綱莫如清簡建官置吏切戒繁多夫爵者官之尊也階者官之次也品者官之序也職者官之掌也位者官之居也祿者官之給也吏者官之佐也雖曰事非官不辦

亦有事因官多而益紊此聖王所以貴寡不貴衆欲靜不欲躁也唐虞稽古建官惟百夏商官倍亦克用乂周卿分職各率其屬厥後官愈多而治愈不古是以漢廢四百縣而下民業定隋廢五百郡而天下政行皆以官不用多而在乎得賢政不徒煩而貴乎省事也今國家立制自宗王及國王郡王國公以下爲爵自特進崇進至將軍大夫校尉郎爲階自正一至從九爲品掌典當行爲職各職所居爲位各位養廉之資爲祿各司贊佐行文之吏爲吏其制亦詳矣然文武二等分部中外本欲圖甯而似乎難甯也伏見京師不急之司院無用之

署局及隨朝臺省院部以下諸有司官吏可兼而不兼可併而不併者有之矣畿外行省隨省諸有司宣慰廉訪等司路府州縣倉庫局監諸衙門官吏亦有冗者矣武臣萬戶所統不滿萬人千戶所管不及千人之類亦已有之矣臣竊以冗官之大弊有三一曰選法之弊二曰政事之弊三曰軍民之弊夫文武官吏員數旣多當考滿之時近春秋之選資格之簿擾攘紛紜保薦之文交錯旁午有司行文且未暇奚暇顧孰果有才孰果有德而考校之哉旣不遑考校則取準於官牘薦書之所陳布已耳於是雜流之途進貨賄之竇開遂致員多闕

少無如之何經營者是得遷除養高者坐淹歲月此選法之弊也夫文武官吏人數既多有當決之事而不決有當行之事而不行問其職則曰我職也問其施則曰曰僚屬非一豈我所能獨主及乎朝廷聞之遂立稽違期限之罰不亦甚與此政事之弊也夫國家用人路廣浮濫得升使之臨蒞在下必不能敷宣政化如是則刻剝之苦役使之煩爲害良多此軍民之弊也三弊不絕而徒立法以防之不知法立而懼法之人姦欺之計益生矣伏望察此三弊凡內外不急之官吏無用之衙門可罷者罷之可併者併之然後以慎重名器之法擇人

而用又以黜幽陟明之法順理而考則典選者易見其人易程其效而選法清矣臨政者事有所歸職有所主而政績成矣在下者省於煩役免於苦刻而民業定矣民者天下之本民業定而天下不太平者未之有也又曰赦者欲以蕩滌瑕穢與民更始以負罪者言之則爲莫大之深恩以致治者論之則非太平之常事也近世以來郊天祝宗建儲立后未有不肆赦者僥倖之子逆知期會能不起非濫之心哉且羅獄者皆人之切心側目者也及乎啼烏夜啟驛馬宵流玉籥告靈金雞樹伏雷雨一解例皆釋之名爲嘉吉之符實皆變異之徵也